




**VISIT
SARAJEVO**



DOBRODOŠLI U SARAJEVO

Grad koji spaja Istok i Zapad, a dive mu se i Sjever i Jug.

Grad u kojem možete čuti kako se miješa zvuk ezana i crkvenih zvona.

Grad u kojem se putnik zapita da li je u Evropi ili na Orijentu.





Površina:
141,5 km²

Nadmorska visina:
500 m

Klima:
Umjereno kontinentalna
klima

Etničke skupine:
Bošnjaci, Hrvati, Srbi,
Jevreji i ostale etničke
grupe

Time zone:
Srednjoevropska
vremenska zone (GMT+1)

Struja:
Napon 220V; frekvencija
50Hz

Voda:
Voda iz gradskih vodovoda
je bezbjedna i prijatna za
piće.

Sarajevo je glavni i najveći grad Bosne i Hercegovine, njena metropola i njen najveći urbani, kulturni, ekonomski i prometni centar. Istovremeno, Sarajevo je glavni grad Federacije Bosne i Hercegovine i sjedište Kantona Sarajevo.


Najviše turističkih atrakcija nalazi se u starom dijelu grada, na Baščaršiji. Laganom šetnjom posjetitelj za kratko vrijeme obiđe centralnu jezgru grada, koja je s ostalim dijelovima grada i okolicom povezana dobro organizovanim javnim gradskim prijevozom. Kroz grad protiče rijeka Miljacka, na kojoj je 20-ak mostova iz raznih perioda, a u neposrednoj blizini je i izvorište rijeke Bosne, koje je ujedno i popularno izletišta. Prosječna nadmorska visina Sarajeva je oko 500 m/nv. Grad okružuju olimpijske planine: Bjelašnica, Trebević, a blizu je i Treskavica. To su omiljena izletišta Sarajlija i turista iz cijelog svijeta, posebno tokom zimskih mjeseci.

Grad je poznat po svojoj

tradicionalnoj, kulturnoj i religijskoj raznolikosti. Tu vijekovima žive muslimani, katolici, pravoslavci i Jevreji. Zbog svoje duge i bogate historije, vjerskih i kulturnih raznolikosti, Sarajevo se ponekad naziva Jerusalemom Evrope, ili Jerusalemom Balkana.

Godine 1914. u Sarajevu su ubijeni austrougarski prijestolonasljednik Franz Ferdinand i njegova supruga Sophie, čime je započeo Prvi svjetski rat. Sedamdeset godina kasnije, 1984. godine u gradu se održavaju 14. Zimske olimpijske igre. Tokom ranih 1990-ih godina ime grada je često bilo na naslovnica dnevnih novina u cijelom svijetu zbog ratnih dešavanja. Danas, u vremenu poslijeratne izgradnje, Sarajevo je najbrže rastući grad u Bosni i Hercegovini. Turistički vodič Lonely Planet svrstao je 2009. godine Sarajevo među deset gradova koje je vrijedno posjetiti. Britanski The Guardian 2017. piše kako je Sarajevo iz pepela opsade 1992.-1995. izraslo u metropolu, koja je u procvatu, i fascinantno turističko odredište.





BAŠČARŠIJA

Baščaršija je omiljena destinacija turista u starom dijelu grada, jer ako niste prošetali trgovom i sokacima koji čuvaju sjećanje na Sarajevo iz osmanlijskog doba, kao da i niste bili u Sarajevu.

Baščaršija (tur. baş + çarşı - “glavna čaršija”) stara je sarajevska čaršija, naselje te historijski i kulturni centar grada. Izgrađena je u 15. vijeku kada je Isa-beg Ishaković osnovao cijeli grad. Njegovim procvatom rasla je i potreba za razvojem raznih zanata. Tako su na tom prostoru lagano počele nicati čaršije, njih 45 s ukupno 81 različitim zanatom. S vremenom su sve čaršije spojene u jednu veliku, koja je nazvana Baščaršija. Turisti ovdje mogu vidjeti kaldrmisane sokake, prenoćišta, crkve, džamije, medrese, imarete i

brojne zanatske radnje.


Centralni dio Baščaršije predstavlja ubjedljivo najprepoznatljivija građevina Sarajeva - Sebilj. Svojom ljepotom, gordošću i postojanjem, još prkosi vremenu i prenosi ljepotu bosanske prijestolnice. U današnjem obliku je izgrađen davne 1913. godine, i s razlogom važi za značajan spomenik arhitekture svog doba. Nakon što se slikaju ispred Sebilja i napiju vode, turisti na Baščaršiji rado i nahrane golubove, koji su uvijek tu.

Krenete li od Sebilja niz ulicu Sarači, prema novijem dijelu Sarajeva, veoma brzo ćete naići na Gazi Husrev-begovu džamiju, najznačajniju islamsku građevinu u Bosni i Hercegovini. Begovu džamiju, kako je lokalno stanovništvo skraćeno naziva,

Gazi Husrev-beg je podigao 1530. godine. Osim džamije, izgradio je i medresu, biblioteku, hanikah, hamam, bezistan, Morića han, sahat-kulu, te niz drugih objekata.

Na Čaršiju se naslanjaju i najstariji spomenici nastali za vrijeme austrougarske vladavine: Vijećnica, Katedrala, Pravoslavna crkva, te stotinjak stambenih objekata.

Baščaršija je poznata po trgovini i proizvodnji bakrenog posuda. Ovdje ćete naći antikvitete, ručno izrađeno bakreno posuđe s orijentalnim dekorom i ornamentikom. Na svakom koraku su i trgovine u kojima se prodaju ručno izrađeni komadi od najkvalitetnije kože, ručno rađeni odjevni predmeti i suveniri koji pričaju historiju grada.





OBAVEZNO PROBATI

Iako Baščaršija obiluje raznim restoranima sa tradicionalnom bosanskom kuhinjom, ono što se mora probati upravo ovdje su sve vrste pita i, obavezno, ćevapi. Sarajevski ćevapi su prepoznatljiv brend, dio su sarajevske tradicije i kulture. To je specijalitet od miješanog mljevenog mesa (junetina i ovčetina) sa roštilja, koje se služi uz posebni, sarajevski somun. Ćevapi se služe uz sitno sjeckani crveni luk, a najčešće se uz njih pije jogurt. Najzastupljeniji su u ćevabdžinicama, kojih je na području Sarajeva veliki broj, ali su najpoznatije i najposjećenije smještene upravo na Baščaršiji.

Uz ostale specijalitete bosanske kuhinje, preporučujemo da probate i tradicionalne poslastice baklavu, hurmašice, ružice, tufahije i kadaif.



Sarajevo
Film Festival
www.sff.ba

Sarajevo
Film Festival
www.sff.ba



Razvoj kulture u Sarajevu počiva na nekoliko bitnih uporišta. Zanimljiva istorija, veliki broj kulturno – istorijskih spomenika iz različitih epoha učinili su ovaj grad pravim muzejem pod otvorenim nebom. U Sarajevu djeluje veliki broj institucija kulture Bosne i Hercegovine, što ga čini i kulturnom prijestolnicom države, ali i važan regionalni centar filmske, likovne i pozorišne umjetnosti.

Posebnu važnost za kulturni život grada imaju godišnji festivali od kojih neki predstavljaju značajne regionalne kulturne manifestacije i

na kojima Sarajevo potvrđuje svoju kosmopolitsku prirodu otvarajući svoje scene za umjetnike iz različitih oblasti kulture i najrazličitijih zemalja iz cijelog svijeta.

Zima u Sarajevu nudi obilje mogućnosti za zimske sportove ili rekreaciju na snijegu, ali i mjesec dana festivala “Sarajevska zima” koji svake godine u Sarajevu okupi umjetnike iz preko 50 zemalja svijeta. Sarajevo je zimi domaćin i Jazz Festivala za kojeg njegovi organizatori vole reći da je: „najveći mali festival na svijetu.“

Proljeće i jesen, sa blagom klimom, nude prijatna istraživanja prirodnih ljepota u okolini i dinamičan program kulturnih manifestacija u gradu poput Internacionalnog teatarskog festival MESS, Dani arhitekture, Evropskih književnih susreta i Festivala savremenog plesa.

Ljeto je vrijeme kada grad, njegovi trгови i ulice postaju «pokretni praznik» i kada grad živi dvadeset i četiri sata dnevno. Ljeto u Sarajevu počinje festivalom Baščaršijske večeri, a završava najznačajnijim kulturnim događajem u regiji – Sarajevo Film Festivalom.

ILIDŽA

TURISTIČKA OAZA U SRCU BOSNE I HERCEGOVINE

Ilidža je najposjećenija općina Kantona Sarajevo. Samo na njenoj teritoriji nalazi se 16 hotela, dva motela, jedan auto-kamp, 1623 soba, oko 3510 kreveta, a u planu je izgradnja i novih hotela zbog sve većeg broja turista koji se odlučuju ovdje doći na odmor

Mnogi stručnjaci koji prate razvoj BiH složiti će se da turizam u našoj zemlji može biti ozbiljna privredna grana. U kategoriji njenih top destinacija svoje mjesto suvereno čuva i Ilidža, gdje je u 2015. godini naspram 2014. broj dolazaka turista bio povećan za čak 38,6%. Zahvaljujući načelniku, prof. dr. Senaidu Memiću, i njegovim saradnicima izvjesno je da će Ilidža u budućnosti doživjeti još prosperitetniji razvoj u oblasti turizma.

SLIKE PROŠLOSTI

Prepoznatljivosti Ilidže doprinose renomirane prirodne i historijske znamenitosti. Rimski most, kameni most s lukovima preko rijeke Bosne, važno je svjedočanstvo historijskih prilika na ovom području. Iako je sagrađen početkom 16. vijeka, u doba Osmanlija, ipak se zove Rimski most, zato što je nastao na temeljima starog mosta iz rimskog perioda. Dug je oko 40 metara, a širok 4,5 metara.

TAMO GDJE CARUJE PRIRODA...

Kruna ilidžanske panorame je, ipak, veličanstveni spomenik prirode – Vrelo Bosne, koje se, prema starim zapisima londonskih novina iz 19. vijeka, opisuje kao

najljepše mjesto na svijetu, s vazduhom koji krijepi, klimom koja očarava, pejzažom koji bi mogao uliti pjesničko raspoloženje, i zelenilom koje odmara.

Prostor Vrela Bosne predstavlja izvorišni dio rijeke Bosne i smješten je jugozapadno od grada Sarajeva, na udaljenosti od 12 kilometara, ispod obronaka planina Igmana i Bjelašnice.

Izlet u prirodi možete početi atraktivnom šetnjom od samog tramvajskog terminala preko banjsko-turističkog naselja Ilidža odakle vas prati zeleni tunel zasadenih stabala platana i kestena u dužini od 3,5 km, kao najljepši drvored u BiH. Veliku aleju čini 726 stabala javorolisnog platana, zasadenih u dva reda 1892. godine, te desetine stabala divljeg kestena zasadenih 1888. godine.



Na samom platou pri ulasku u Veliku aleju goste dočekuju kočijaši nudeći nezaboravnu vožnju fijakerom do samog izvora.

Centralni dio se prostire na 603 hektara površine i sastoji od više malih bistrh otočića u zelenilu preko kojih se nadvijaju drveni mostovi za šetače, tu su i prostrane livade, parkovi za djecu te krasni bijeli labudovi.

USPOMENA U MIRU

Tragovi novije historije skriveni su u tunelu napravljenom ispod aerodromske piste tokom opsade Sarajeva. Tunel spasa, dug oko 720 metara, a visok 1,5 metara, vodio se pod imenom Tunel kojeg nema predstavljajući tada najstrožiju tajnu

Sarajeva, jer su kroz njega u grad dolazile životne namirnice, oružje, lijekovi... Nakon četiri mjeseca i četiri dana kopanja lopatom i krampom, probijanjem iz pravca Dobrinje i Butmira istovremeno, pušten je u promet 30. jula 1993. godine.

Za 30 mjeseci, koliko je tunel bio u upotrebi, registrovano je blizu tri miliona prelazaka s jedne na drugu stranu. Nakon potpisivanja Dejtonskog mirovnog sporazuma i završetka rata, prestala je potreba za korištenjem tunela, tako da Tunel spasa danas predstavlja muzej u kojem možete vidjeti veliki broj fotografija, video zapisa i predmeta korištenih u periodu kada je tunel bio jedina veza Sarajeva s ostatkom svijeta.


Nekom lijek, nekom odmor

Ilidža je također mjesto na kojem se nalaze popularni objekti za rehabilitaciju i aktivni odmor. Lječilište i spa centri odlični su za rehabilitaciju i relaksaciju pacijenata u domenu fizikalne medicine i rehabilitacije, internističke medicine, ginekologije, urologije i usluga laboratorijskih nalaza. S druge strane, na površini od 15 hektara, postoji kompleks koji svojim posjetiocima nudi prijatno opuštanje i aktivan odmor na unutrašnjim i vanjskim bazenima s brojnim atraktivnim vodenim i animacijskim programima. Ovaj najveći termalni kompleks u ovom dijelu Evrope razvijen je na toplim izvorštima Ilidže.










OLIMPIJSKE LJEPOTICE

Atraktivne lokacije i pravi magnet za turiste zasigurno su olimpijske ljepotice poput Bjelašnice, Igmana i Trebevića, čija ljepota pod snježnim pokrivačem jednostavno ostavlja bez daha. No, one su jednako privlačne i na proljeće kada se vegetacija probudi. Zelena prostranstva i zrak koji opija, šetnje, planinarenje, brdski biciklizam, vožnja žičarom ili kvadovima, paraglajding i brojne druge aktivnosti pozivaju na odmor i bijeg od gradske vreve.



BJELAŠNICA

Najčiši ski centar u BiH

Jedan od vodećih ski centara u našoj zemlji je Bjelašnica, mjesto gdje su se na 14. Zimskim olimpijskim igrama održala takmičenja u alpskom skijanju, u muškoj konkurenciji.

Nalazi se u centralnom dijelu Bosne i Hercegovine, udaljena samo 25 kilometara od Sarajeva. Olimpijsku planinu s privlačnim i do nekoliko metara visokim snježnim smetovima karakteriše izuzetna promjenjivost klime, tako da je na njoj moguće doživjeti tri godišnja doba u jednom danu.

SKIJAŠKA STAZA

Staza ima za sve profile – od početničkih plavih, do onih

ozbiljnih, olimpijskih crno–crvenih koje su izazov i za najbolje skijaše. Do ovih staza se stiže trosjedom, a do vrha planine možete produžiti ski liftovima.

Žičare su aktivne i u ljetnom periodu i moguće je panoramsko razgledanje Bjelašnice s trosjeda.

Turistička ponuda je poprilično bogata. Na Bjelašnici postoji nekoliko hotela, kao i veliki kapaciteti apartmanskog smještaja. Predahnuti možete u nekoj od obližnjih kafeterija ili restoranima s tradicionalnom kuhinjom.

NEPROCJENJIVA BLAGA PRIRODE

Pored divnih pejzaža na Bjelašnici se mogu vidjeti i dva interesantna sela: na 1.275 m nadmorske visine je selo Umoljani, dok se na gotovo


1.500 metara visine nalazi najviše i najizoliranije selo u cijeloj zemlji, Lukomir

Dok ćete u Umoljanima uživati u pogledu na autentične pastirske kolibe, katune, za Lukomir su karakteristične kamene kuće, koje su prekrivene šindrom od trešnjinog drveta.

Na oko 200 metara od ulaza u Umoljane nalazi se nekropola stećaka. Nadgrobni spomenici, stećci, njih oko 20, ugrađeno je i u temelje jedinstvene džamije u Umoljanima koja ima limenu munaru i koja je proglašena nacionalnim spomenikom BiH.

IGMAN

Jugozapadno od Sarajeva, s najvišom tačkom od 1502 metra, smještena je još jedna olimpijska



Ijepotica – Igman. Tokom 14. Zimskih olimpijskih igara bila je, uz Bjelašnicu, jedno od glavnih borilišta kada su se izgradile dvije skakaonice od 70 i 90 metara. Ovdje se nalaze Veliko i Malo polje sa oko 30 km uređenih staza za biatlon i skijaško trčanje, a veliki potencijal ima i za razvoj brdskog biciklizma.

Igman je jedina planina oko Sarajeva koja nije bila intenzivno naseljena, stoga uživa epitet čiste planine koja je danas, kako u zimskom tako i u ljetnom period jedna od vodećih turističkih atrakcija u okolici grada Sarajeva.

TREBEVIĆ

Pluća Sarajeva

Za svega petnaest minuta vožnje možete iz centra Sarajeva doći do planine Trebević (1.629 m n/v),



odakle se pruža veličanstven pogled na grad.


Njegova velika šuma pročišćava vazduh služeći kao pluća Sarajeva, ali i mnogih susjednih zajednica.

Trebević je jedna od omiljenih prirodnih atrakcija građanima Sarajeva i njihovim gostima, koji mogu doći na jednodnevni izlet ili ostati duže. Danas je mjesto susreta planinara, avanturista i ljubitelja prirode koji potom odlaze u misiju istraživanja divne planine.



Odmaralište “Brus” na Trebeviću izraslo je u krasni turistički kompleks s lijepim restoranom, mnogo zabave i sportskih mogućnosti.

Kompleks sada uključuje jezero, biciklističke i planinarske staze, roštilj, igralište za odbojku, fudbalski teren i mjesto za paintball, kao i igralište za djecu.







SARAJEVO S DJECOM

Igraonice, zoološki vrt, zabavni parkovi kao i brojni drugi sadržaji pružaju nezaboravne trenutke zabave za djecu, ali i mir koji roditelji pronalaze dok su njihovi mališani zbrinuti.

"Sunnyland"

SUNČANA STRANA ZABAVE

Slikovita lokacija Zlatišta, deset minuta od sarajevskog centra, dom je fascinantnog zabavnog parka izgrađenog u skladu s najstrožijim evropskim standardima.

Glavna atrakcija zabavnog parka

Sunnyland je alpine roller coaster, dužine 600 metara. Maksimalna brzina koju vozilo na alpine coasteru može razviti je 40 kilometara na sat. Dostupan je tokom cijele godine.

U sklopu Sunnylanda nalaze se tri objekta, šetalište i jezero s vodoskokom. U glavnom objektu se nalaze restoran, caffe slastičarna i aktivne igraonice za djecu, te suvenirnica.

ZOOLOŠKI VRT PIONIRSKA DOLINA

Ovaj zabavni park idealno je mjesto za cijelu porodicu i služi kao omiljena vikend destinacija.

Pored zoološkog vrta postoje i brojni drugi sadržaji. Mališani će se radovati vožnji malim vozicom, trampolini, autićima na struju, vrteški, autodromu i gumenom gradu. Kada se umore, predah mogu pronaći u parkovima s ljuljačkama, klackalicama i toboganima koji su uvijek puni djece.

Pionirska dolina je bogata različitim hortikulturnim sadržajima, bogatom florom i faunom. Ukoliko ste ljubitelji životinja, možete vidjeti oko 39 životinjskih vrsta među kojima su lame, klokan, antilope, zebre, lav i lavica, jeleni, srne i mnoge



U centralnom dijelu su fontana, šadrvan i ljetna pozornica oko koje su za vrijeme toplijih dana u godini postavljene ljetne bašte. Pored bogatog sadržaja i prirodnog okruženja, posjetitelji mogu predahnuti u jednom od dva ugostiteljska objekta.




druge životinje iz različitih dijelova svijeta.

“Safet Zajko” Park

UTOČIŠTE ZA LJUBITELJE SPORTA I REKREACIJE

Kompleks sadrži fudbalski teren, atletsku stazu, biciklističku stazu dužine 400 metara, teren za odbojku na pijesku


, košarkaški teren, svlačionice, sprave za fitness na otvorenom, veliki broj dječijih igrališta, pješačke staze i 50 klupa za sjedenje, a od prošle godine proširen je za oko hektar uredenog parka. Tako je kompleks obogaćen novim sadržajima, pa su tu tenisko igralište, teren za stoni tenis i alpinistički trening park s umjetnim stijenama za penjanje.



"KINDERLAND"

- SVIJET AVANTURA ZA NAJMLADE

Najveća igraonica u regiji, Kinderland, nalazi se na Ilidži. Prostire se na 1.400 kvadratnih metara, dok nekoliko etaža čini više od 3.000 metara kvadratnih na kojima su postavljene brojne zanimljivosti za najmlađe. Raznolik sadržaj pruža djeci nezaboravnu zabavu i ukazuje na značaj igre u djetinjstvu, koju su računari i moderne tehnologije stavile u drugi plan, pa ne čudi zašto igraonica Kinderland zauzima visoko sedmo mjesto u Evropi.





IZLETIŠTA OKO SARAJEVA

Uz brojne parkove koji se nalaze u samom gradu, bijeg od dinamičnog života možete pronaći također na izletištima u njegovoj okolini. Okruženi zelenilom, oni nude mir i odmor u ljupkoj, netaknutoj prirodi. Idealni su za šetnju, trčanje i bicikliranje.






BARICE I ČAVLJAK

Izletište Barice udaljeno je svega 9 kilometara od Sarajeva. Samo 4 kilometra asfaltiranog puta od Barica vodi do izletišta Čavljak, gdje se nalazi Planinarski dom. Osim prekrasnog pogleda na Sarajevo, također imate mogućnost vožnje bicikla i šetnje po prirodi.

VODOPAD SKAKAVAC

Vodopad Skakavac udaljen je 12 kilometara od Sarajeva. Nalazi se iznad sela Nahorevo, na rječici Skakavac, u izvorištu rijeke Vogošće. Vodeni protok vodopadom nije veliki, ali zbog svoje visine od 98 metara spušta se u bezbroj malih vodenih slapova,



kapi i najsitnijih vodenih čestica koje stvaraju vodenu prašinu i čine ga jednim od najljepših i najvećih vodopada u Bosni i Hercegovini, a petim najvišim vodopadom na Balkanu. Zbog prizora kada je okovan ledom, vrijedan je posjete i u zimskim danima.

Osim za šetnju i odmor u prirodi, staze na Skakavcu poznate su i ljubiteljima planinskog biciklizma.

ZAŠTIĆENI PEJZAŽ “BIJAMBARE“

Četrdeset kilometara sjeverno od Sarajeva nalazi se pravi dragulj, zakonom zaštićeno prirodno područje Bijambara, omiljena





destinacija onih koji žele spas od ljetnih vrućina potražiti u hladovini guste crnogorične šume.

U sklopu ovog zaštićenog područja, koje se prostire na 370 hektara, na prosječnoj nadmorskoj visini od 950 metara, nalazi se nekoliko predivnih pašnjaka, vrtače i ponori dvaju potoka, te šest pećina. Posjetioци mogu obići s vodičem Srednju bijambarsku pećinu kroz koju vodi 400 metara duga turistička staza ukrašena pećinskim nakitom (stalaktitima, stalagmitima, draperijama, bigrenim kadama, stubovima).



Područje zaštićenog pejzaža "Bijambare" opremljeno je stolovima i klupama za boravak u prirodi, te ima igralište za djecu - Drveni grad i restoran s raznovrsnom gastronomskom ponudom. Posjeduje biciklističke, obrazovne i šumske staze.

Na glavnom ulazu u Bijambare možete odabrati hoćete li obilazak započeti turističkim vozom koji vozi kroz šumu u dužini od dva kilometra, da li ćete iznajmiti bicikl, ili ćete šetajući uživati u krajoliku.





ŠOPING U SARAJEVU

U Sarajevu se nalazi nekoliko velikih, modernih shopping centara u kojima svako može naći nešto za sebe. Neki od njih locirani su u razmaku od svega nekoliko stotina metara.

Svi oni nude širom svijeta poznate brendove visoke mode, sportske i dječije odjeće kao i tehnologije, pružajući jedinstveno iskustvo kupovine. Frizerski saloni, fitness centri, poslovnice banaka sastavni su dio svakog centra.

Da biste uživali u zanimljivim gastro sadržajima ne morate napuštati shopping centre, jer svi nude veliki broj restorana, barova, kafića i slastičarni. Za najmlađe je tu igraonica, a za odrasle i kuglana. Svoje automobile možete parkirati u podzemnim garažama.



SMJEŠTAJNI KAPACITETI

Koliko je Sarajevo atraktivna i privlačna destinacija turistima iz cijelog svijeta govori podatak da se iz godine u godinu broj posjetitelja povećava. Kako bi zadovoljili potrebe i odgovorili na zahtjeve svih gostiju, glavni grad raspolaže brojnim smještajnim kapacitetima. Od luksuznih i poznatih hotelskih lanaca s 5*, preko motela, apartmana, hostela pa do privatnog smještaja. Prema podacima s



Booking.com, Sarajevo raspolaže s više od 700 smještajnih jedinica.

GASTRO POSLASTICE

Tokom boravka u gradu na Miljacki ljubitelji dobrog zalogaja uživat će u gastro ponudi. Pored tradicionalne bosanske kuhinje, zastupljene su i mediteranska, orijentalna i azijska kuhinja, a u ponudi je sve, od ugodnih restorana do povoljnih brzih usputnih zalogaja.

Najpoznatija i najprepoznatljivija delicija zasigurno je sarajevski ćevap, ali i razne vrste pita koje možete pojesti u buregdžinicama. Za one koji vole moderniju kuhinju u ponudi su i internacionalni restorani. Raznovrsna gastronomska ponuda,

od jednostavnih gostionica do gurmanskih restorana, predstavlja veliku prednost za Sarajevo kao turističku destinaciju.

HARMONIJA DUHA I TIJELA

Mjesto gdje ćete doživjeti potpunu relaksaciju i upotpuniti vaš odmor zasigurno su i spa centri kojih u Sarajevu ne manjka. Provedite vrijeme posvećeno samo vama, oslobodite se stresa i nahranite um, duh i tijelo raskošnim spa tretmanima i masažama. Pored klasičnih, Sarajevo nudi i posebne spa centre namijenjene samo ženama.



Rijeka Miljacka, duga svega 36 km, broji dvadesetak mostova građenih od turskog doba pa sve do danas.





Turistička zajednica Kantona Sarajevo

Sarajevo, Bosna i Hercegovina
www.visitsarajevo.ba
info@visitsarajevo.ba